

023 阮「妹妹」// ⊙呂宇寧 (04/07thk改寫)

阮「妹妹」毋是人，伊是一隻狗，因為我是厝--裡上細漢的，所以我足希望有一个弟弟抑（iah）是妹妹；我將伊當做是我的妹妹，伊的名叫做「小乖」。伊是按怎來阮兜--的？講來嘛真拄好。自細漢我就希望有一隻狗仔，毋閣，爸爸毋予（hōo）我飼，爸爸講飼狗仔足麻煩的；但是有一擺，阿媽祛（khioh）著一隻狗仔，伊就問我kám欲飼，我一看著這隻狗就足恰意（kah-ì），伊足古錐，所以我一直求阮爸爸；了後，阮爸爸只好予（hōo）我飼。我家已騎孔明車去將這隻狗仔載--轉來，伊足細隻--的，比我的手較大一點點仔niâ。我將伊載轉--來了後，阮全家攏足恰意--伊，爸爸泡牛奶予伊食，我看伊佇咧食牛奶的模樣是足古錐--的，我恰阿兄、阿姊替伊號名，雖然我一開始叫伊「小乖」，毋閣，後來我攏嘛清彩叫，所以伊的名閣有足濟--的。

伊真正是我的妹妹，伊陪我耍（sng），聽我講話，我無歡喜的時陣，伊陪佇我的身軀邊，我的心事攏kan-na會共（kā）伊講；有時陣，伊恬恬坐佇我的身軀邊，有時陣，伊會用舌來共我舐（tsinn），親像是佇咧安慰--我，叫我莫（mài）哭；伊嘛是足愛耍--的，定定走--出去，就毋知通轉--來，攏愛我去tshue伊轉--來。每擺我食著好食物件，攏會提予伊食；有伊佇--咧彼段日子，我真正足快樂--的。

真可惜，佇伊五歲的時陣，因為破病煞來死--去，我足傷心--的；我艱苦兩三年，每擺若想著伊，就一直流目屎，佇彼段時間，我攏無愛tshap--人，無愛講話，家已過家己的生活，做家己的代誌；其實嘛毋是kan-na我艱苦，阮規家伙仔攏足傷心--的，只是無講--出來niâ。

我真正足愛我的妹妹，雖然伊袂講話，但是伊有一粒足體貼的心，我永遠攏袂將伊放袂記--得；到這-má，我攏毋敢閣飼狗，雖然我也是足恰意狗仔，但是，我毋敢飼，我驚講我若閣飼狗，會想起「小乖」，我就足傷心--的。（約600字）